



## L' FEUME DA...

(...kî don ? Voci on novia ptit bokèt k' arêve du passer avant l' ôte, dèl pådje 71, mins, i nos falève vos fé glêter. Ènn'don ?)

« Cink eûres... i va Bén rade ièsse là... » s' a dit Eliza. Rén k' a l' idêye, l' volà ki n' pout pus ote.

Èle a choûrbu, rinètiyî tote li sinte djournêye, aprusté l' sipèsse sope po l' dinner. Amon nos ôtes, on n' èst nén acostumé à mougni loûrd à l' vièsprêye mins i l' faut Bén por li ki boute à l' ûsine èt n' disdjune ki d' marindes aus oûs. Èyèt asteûre, rén k' à mète li tauve, sès brès pèsenut èt ritchêre sins pont d' vîye

l' long di s' cwârp. On amitiéus sintumint li fait toûner s' tièsse; à coût d' alinne, sins pus polu boudjî, èle s' agripe à l' blinkante bâre dèl sitûve.

Tos lès djoûs c' èst l' minme. Dins ène chouchiye d' munutes, Djîle sèra là: Èliza n' èst k' on cwârp sins pus pont d' fwace, nèyî d' doûceû, fondu d' lanwichådje. Èliza n' èst pus k' atinde.

Èle si sint prèsse à s' daurer dissus li èt l' sèrer dins sès brès, mins, à voye l' grand cwêr Bén mimbéré ki s' mostère d' on côp dins l' craye di l' uch, èle èst co pus flawe.

A chake fiye, i l' trove à djoke, ène miète èwarêye èt c' è-st-a li di s' aprotchî adlé lèye èt l' doûcemint bètchi dsus s' front.

- Vos n' avèz nén vèyu lès èfants ? Èles son-st-èvoye à vosse ranconte.

I rissatche si cazake d' ovri, passer s' rèche mwins dins sès tchivias èt s' achîre. S' tchimise baue dissus s' neûwe bodje, i grète ène miète si pwètrine èwou rbike ène boyète di pwèls.

I répond :

- Nonna...èles sont d' alêe djouwer dins l' pachi avou lès ôtes. On a Bén droci on caré d' ièbe, mins lès èfants vèyenut todi pus voltîye l' djârdin d' a costé...

- Dji n' 'm' è fait nén po ça... mins on èst sèmdi.. Dj' a aprusté l' grande bassène po lès î bagnî... L' eûwe s' a chandi au solia.

Èle vént à costé d' li, pènetêye dissus sès mousemints ène fwate odeûr di suweû, d' fiêr, d' ôle, d' ovrådje – l' odeûr da Djîle... èle sicrèpe s' tinre massale conte l' pia nén razêye da li - li rèche massale da Djîle... lès tchivias da Djîle... lès lèbes da Djîle... lès ouy da Djîle...

- Djîle...di-st-èle, li coût ptit nom, ki s' ramouye come on chuchotlådje ; kand èle li prononce, li glète si sipaud è s' boke, frèchî l' raye di sès lèbes èt, tèvozè, î lèyî rèche deus tènès bolètes aus cwanes.

I n' vos faut nén vos èwarer, on comèle èt maxhe todi lès moudêyes di sicrijhaedje